



ACORDO DE COLABORACIÓN ENTRE A SECRETARÍA XERAL DA IGUALDADE E COOPERATIVAS LÁCTEAS UNIDAS, S.C.G. (CLUN) PARA A VISIBILIZACIÓN E APOIO A PROXECTOS DE PROMOCIÓN DA IGUALDADE.

Santiago de Compostela, 19 de xullo de 2018

REUNIDOS

Dunha banda:

A Secretaría Xeral da Igualdade, representada por Susana López Abella, en virtude do Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia, do Decreto 72/2013, do 25 de abril, polo que se establece a estrutura orgánica da Vicepresidencia e Consellería de Presidencia, Administracións Públicas e Xustiza, en virtude do seu nomeamento polo Decreto 160/2016, do 24 de novembro e de acordo coa competencia atribuída na Orde do 29 de decembro de 2017 sobre delegación de competencias na Secretaría Xeral Técnica da Consellería de Presidencia, Administracións Públicas e Xustiza e noutros órganos da Vicepresidencia e Consellería de Presidencia, Administracións Públicas e Xustiza.

Doutra:

Cooperativas Lácteas Unidas, S.C.G, con CIF F70509096, representada por D. José Ángel Blanco Purriños na súa condición de Presidente da entidade, que actúa no seu nome e representación.

Ambas as dúas partes interveñen en función dos seus respectivos cargos e no exercicio das facultades que en nome das entidades que representan teñen conferidas e,

EXPOÑEN

Primeiro

Que a Constitución española, no artigo 14, proclama o dereito á igualdade e á non discriminación ao establecer que as persoas son iguais ante a lei, sen que poida prevalecer ningunha discriminación por razón de nacemento, raza, sexo, relixión, opinión ou calquera outra condición ou circunstancia persoal ou social.



Do mesmo xeito, o Estatuto de Autonomía de Galicia encomenda aos poderes públicos galegos a obriga de promover as condicións para que a liberdade e a igualdade das persoas e dos grupos en que se integran sexan reais e efectivas, ademais de remover os atrancos que impidan ou dificulten a súa plenitude, facilitando a participación de todos e todas na vida política, económica, cultural e social.

Segundo

Que á Secretaría xeral da Igualdade, como órgano superior da Administración autonómica en materia de igualdade correspóndenlle, entre outras funcións, a de propoñer medidas, programas e normas dirixidas á promoción do exercicio efectivo dos dereitos das mulleres, incrementando a súa participación na vida económica, laboral, política, social e cultural, así como a impulsar actuacións conducentes á eliminación da violencia de xénero.

Terceiro

Que o artigo 42 do Decreto Lexislativo 2/2015, do 12 de febreiro, polo que se aproba o texto refundido das disposicións legais da Comunidade Autónoma de Galicia en materia de igualdade, recolle que “A Xunta de Galicia adoptará, dentro das súas competencias, as medidas conducentes a eliminar a discriminación contra as mulleres en zonas rurais, coa finalidade de asegurar, en condicións de igualdade entre as mulleres e os homes, a súa participación nos beneficios dun desenvolvemento rural sustentable” .

E o VII Plan Estratéxico de Galicia para a igualdade de oportunidades entre mulleres e homes 2017-2020 recolle, entre outros obxectivos estratéxicos, o de impulsar a empregabilidade e o desenvolvemento profesional das mulleres rurais e do mar como motor de dinamización demográfica e crecemento económico dos seus municipios

Cuarto

Que a cooperativa de segundo grado CLUN (Cooperativas Lácteas Unidas) ten entre os seus obxectivos, mellorar o entorno social, apoiando proxectos que melloren a comunidade, así como afianzar a igualdade de oportunidades entre mulleres e homes e promover a conciliación da vida persoal, familiar e laboral entre o seu equipo humano.

Por todo o exposto ambas as dúas partes acordan asinar o presente Acordo en base ás seguintes



CLÁUSULAS

PRIMEIRA. OBXECTO

Constitúe o obxecto deste Acordo o establecemento das condicións polas que se rexerá a colaboración entre a Secretaría xeral da Igualdade e Cooperativas Lácteas Unidas para poñer en valor o traballo das mulleres, dando visibilidade ás actuacións levadas a cabo pola cooperativa no marco do proxecto “Mulleres de Seu” que trata de promover o empoderamento e o desenvolvemento profesional das mulleres, dignificando o seu papel no ámbito rural.

A estes efectos, a Secretaría Xeral da Igualdade:

- Impulsará a difusión a través da súa páxina web, igualdade@xunta.gal, daquelas actividades que se realicen dentro do dito proxecto e que resulten de interese para poñer en valor o liderado e o talento feminino
- Terá en conta, ao abeiro da planificación de actividades formativas, informativas ou de sensibilización no marco da promoción da igualdade de oportunidades entre mulleres e homes así como de prevención e loita contra a violencia de xénero que teña previsto desenvolver durante o ano 2018, aquelas que promovan o empoderamento e a toma de conciencia de xénero entre as mulleres galegas do ámbito rural, así como as que permitan abordar a violencia de xénero tendo en conta as especificidades das mulleres que viven no medio rural.
- Promoverá a implicación, presenza e colaboración activa das mulleres nos procesos de xestión e toma de decisións da cooperativa.
- Poderá asesorar a Cooperativas Lácteas Unidas en cuestións de igualdade de trato e de oportunidades e traballará coa cooperativa para a posta en marcha de iniciativas con enfoque de xénero, en particular daquelas orientadas a facilitar a conciliación da vida persoal, familiar e laboral así como de promover a corresponsabilidade.

SEGUNDA. FINANCIAMENTO

O desenvolvemento deste acordo non conleva achega económica a favor de ningunha das partes asinantes.

TERCEIRA. VIXENCIA

O presente acordo producirá efectos a partir da súa sinatura e ata o cumprimento do seu obxecto e, en calquera caso, ata o 31 de decembro de 2018.



CUARTA.- RÉXIME XURÍDICO

Este acordo de colaboración ten carácter administrativo, polo que os seus efectos rexeranse polo establecido nas súas cláusulas e no seu defecto pola normativa xeral que lle sexa de aplicación.

E, en proba de conformidade cos termos do Acordo, as partes comparecentes asinan e rubrican por duplicado exemplar, no lugar e data indicados no encabezamento.

Pola Secretaría Xeral da Igualdade

**Por Cooperativas Lácteas Unidas, S.C.G.
(CLUN)**

Susana López Abella

José Ángel Blanco Purriños